

## VII XORNADAS DE TECNOLOXÍA DE GALICIA

20 e 21 de ABRIL de 2007

I.E.S. "FERMÍN BOUZA BREY" (VILAGARCÍA DE AROUSA)

Estimad@s compañeir@s:

Un ano máis a ASOCIACIÓN DO PROFESORADO DE TECNOLOXÍA DE GALICIA (APETEGA) ten o pracer de comunicarvos a celebración das VII XORNADAS DE TECNOLOXÍA no IES "FERMÍN BOUZA BREY" (Vilagarcía de Arousa).

Con este xa van sete anos detrás dun importante obxectivo da asociación: a creación anualmente dun espazo de reunión do profesorado galego de Tecnoloxía, aberto a todo tipo de experiencias didácticas, dende o intercambio de ideas e de material de aula, ata a creación de grupos de traballo, análise e debate da situación da Tecnoloxía en Galicia e en España, etc. Este ano, este último punto ten unha importancia crucial dado o maltrato que a Administración está a acometer coa área de Tecnoloxía.

Coma tódalas edicións anteriores, as xornadas seguirán a ter a seguinte estrutura básica:

1. *Obradoiros prácticos*, impartidos por profesorado de Tecnoloxía en activo e cos que se pretende iniciar ou ampliar o traballo na aula nalgún aspecto do amplísimo currículo da nosa área. Nunha área coma a nosa de contidos eminentemente prácticos esta é a razón principal da existencia das xornadas.
2. *Exposición de proxectos e comunicacións educativas*, coa que amosar algúns dos traballos ou experiencias que realizamos na nosa práctica docente e cos que tomar ideas e mellorar a nosa metodoloxía de traballo. Esta é unha parte das Xornadas ás que queremos darlle un maior pulo, por esta razón animámosvos a que participedes, xa sexa simplemente levando un par de proxectos ou maquetas, tanto feitos por vós como polos vosos alumnos, como escribindo unha comunicación ou artigo relacionada con calquera aspecto da área de Tecnoloxía. No momento da apertura e durante todas as Xornadas recolleremos os proxectos para incluílos na exposición, que estará aberta ao público durante o transcurso das mesmas.

Para participar como poñente dun obradoiro ou comunicación, pregámosvos que previamente, a ser posible antes do 1 de abril, enviades á dirección [xornadas@apetega.org](mailto:xornadas@apetega.org) os seguintes datos:

- Título da comunicación ou descrición do material exposto.
- Datos de contacto: nome e apelidos, teléfono, dirección postal ou de correo electrónico.
- Descrición do material que presenta: proxectos, póster, vídeo, web, etc.
- Resumo da comunicación ou material diverso para publicar na revista ou no CD.
- No caso de aportar proxectos de aula para a exposición, estes poden ir acompañados dunha breve información (centro, nivel do alumnado, descrición, etc.).
- Tamén indicade o material que necesidades para a vosa comunicación ou obradoiro (canón de vídeo, ordenador, retroproector, etc.).

Este ano temos dúas novidades respecto das xornadas anteriores. Unha é a intención de crear colectivamente nun pc accesible a todos os asistentes un repositorio para o intercambio de material de aula en formato dixital (programas, presentacións, imaxes, vídeos...).

Por suposto tamén está o aspecto lúdico, algo ó que nos gusta darlle especial relevancia nas nosas xornadas a través de diversos actos. Polo que ademais dos consavidos xantares e cea, a outra novidade desta edición será unha olimpíada tecnolóxica a xeito de xincana, na que poñeremos a proba a nosa habilidade tratando de pasar un bo rato.

Logo do éxito do ano pasado, tamén se mantén a ampliación da duración das xornadas ó venres pola mañá para que poidamos realizar unha visita didáctica. Nesta ocasión celebrarase no Concello de Cambados con dúas interesantes visitas ao muíño de mar da Seca e á adega Martín Códax. Cómpre dicir que dita visita non está incluída dentro do horario oficial das Xornadas por parte da Consellería, polo que aquelas persoas interesadas deberán solicitar autorización por parte da inspección de cada centro (ou solícialas como horas de asuntos propios).

APETEGA entregará un diploma acreditativo (homologado pola Consellería de Educación) por un total de 15 horas ás persoas que asistan ás xornadas.

Recordarvos tamén que na páxina web: [www.apetega.org](http://www.apetega.org) poderedes atopar información sobre a asociación, as Xornadas, ligazóns de interese, lexislación, etc.

Asemade, non dubidedes en empregar o correo electrónico para calquera asunto sobre as Xornadas ([xornadas@apetega.org](mailto:xornadas@apetega.org)) ou sobre APETEGA ([contacto@apetega.org](mailto:contacto@apetega.org)).

Un saúdo e animádevos a participar.

*A directiva de APETEGA.*

*Vilagarcía de Arousa, 1 de marzo de 2007.*

apetega